



17. august 2012

EM 2012/144

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Inuiaqatigiinnik imminut napatittunik namminersulivissimasunillu ineriartortitsinermit peqataasussat Meerartatta inuusuttattalu nammineersinnaallutik perornissasa qanoq angunissaa pillugu apeqquteqaat allaavigalugu oqallinnissamik siunnersuut
(Inatsisartunut ilaasortaq Jørgen-Ole Nyboe Nielsen, Demokraatit)

Tungavilersuut

Uangut inuit inuusarpugut amerlasuunik piginnaaneqarluta, ilinniartitaanerpulli inuttut inersimasutut inuunitsinnut pingaaruteqartoq pilersinneqartarpoq meeraanitsinni inuusuttuunitsinnilu toqqaannartoq toqqaannangitsorlu ilinniartitaaneq aqputigalugu.

Asanninneq isumassuinerlu peroriartornitsinni angajoqqaatta tunniuttagaat pingaarutilerujusuuvoq inuttut qanoq ineriartornitsinnut. Ilisarnaataasussaavoq allanut inunntut pissusilersortarnitsinnut aamma inoqatitsinnut qanoq pissusilersortarnitsinnit aammalu inuunitsinnut inuiaqatigiinnullu ilaanitsinni akisussaassusermik qanoq annertutigisumik tiguserusunnitsinnut.

Aamma atuarfik angisuumik sunniuteqartarpoq, atuagassornikkut sunik soqutigisaqarnitsinnut qanorlu piginnaaneqalartarnitsinnut, inuttut aamma inuiaqatigiittut. Ilinniartitsisut maligassiuissuupput amerlasuutigullu meeqqat akisussaassuseqarnerat, misiginneqatiginnissinnaanerit il.il. sunnertarpaat.

Angajoqqaat atuarfiillu kinguaariit tulliinut ilusilersueqataasussaammata, isumaqarpunga inuiaqatigiit qulakkeertariaqaraat, tamatuma pitsaanerpaamik pinissaa.

Angajoqqaajuneq angajoqqaallu akisussaassuseqarnerat ersarissartariaqarpoq aamma angajoqqaat pisariaqartitaminnut ilinniarsinnaasariaqarput naammassinninnissaminnullu tapersersorneqarlutik.

Isumaqarpunga, angajoqqaat akisussaaneertik nammattariaqaraat qitornatillu pitsaanerpaamik meeqqat atuarfiannik naammassitillugit, meeqqat naalattunngortilugit piareersarluarsimallutillu piffissamik paarsilluarnissaat, meeqqat inoqatinut allanut ataqqinninnissaq ilinniassagaat, kalaallit nunaanni pinngortitaq kulturilu aammalu nammineq napatilernissartik. Isumagissavaat meeqqat nammineersinnaallutik angerlarsimaffik qimassimassagaat piareersimaffigalugulu inuiaqatigiinni inooqataanissaq.

Aamma atuarfik, sualummillu ilinniartitsisut, suliassaat akisussaaffiilu ersarissarneqassapput aamma ilinniartitsisunngorniartarnermi qulakkeerneqassaaq, pineqartunut paasinnissinnaanissaq piginnaasaqarnissarlu.

Isumaqarpunga ilinniartitsisut maligassiuinerannut ilaassasoq, ilinniartitsisut maligassiuinnaratik piffissaq eqqorlugu takkuttassasut piareersarluarsimallutik. Atuartunut takutitsilluassapput malinnaalluarnissamut atuakkerisarnissamullu aamma ilinniartitsisut kikkut tamaasa ataqqillugit pissusilersussapput. Ilinniartitsisut isumaga naapertorlugu maligassiuissuussapput malinnaalluarnissaq inunnullu allanut ataqqinninnissaq eqqarsaatigalugit.

Inatsisartuni partiit Naalakkersuisullu angajoqqaat ilinniartitsisullu suliassaannut isumaat tusarusuppakka aamma qilanaarpunga meerartatta nammineersinnaalernissaannut taamaasillutillu inuiaqatigiinnik nammineq napatittunik namminersulivissimasunillu ineriartortitseqataalernissaasa qanoq qulakkeernissaanut isummersuutinik tusarnissannut.